



أساسيات الطريق إلى الله

الدرس (17) | كيف أحفظ القرآن ؟



م / علاء حامد

فريق التفریغات



الحمد لله واشهد أن لا إله إلا الله وحده لا شريك له واشهد أن محمداً عبده
ورسوله صلى الله عليه وسلم أما بعد:-

الدرس بإذن الله تعالى النهاردة هيدور حول موضوع هو لا شك من الأهمية
بما كان وأي إنسان يسير إلى الله سبحانه وتعالى لا يستغني عنه فإنه شيء أساسي في
صلاح القلوب وفي حياة القلوب.

احنا المرة الي فاتت اتكلمنا عن نصائح لطلب العلم **على اعتبار إن طلب العلم ده شيء**
بديهي في أي واحد يطلب القرب من الله سبحانه وتعالى واتكلمنا عن النصائح الي
ممكن يعمل بها الإنسان في طلب العلم واتكلمنا في النهاية عن منهج ميسر لطلب العلم
.. **بلا شك أن طلب العلم لا يستغني عن القرآن** لأن أي طلب علم هو عبارة عن قال
الله وقال الرسول عليه الصلاة والسلام وقال الصحابة الكرام رضي الله عنهم .. فأني
شخص لا يحفظ القرآن أو يحفظ بعض من القرآن يكاد يكون لا يستطيع أن يطلب
العلم .. كل مسألة عليها دليل .. كل مسألة محتاج يحفظ آية ويحفظ حديث .. إذا كان
يعتقد أنه يبدأ طلب العلم بدون ما يحفظ القرآن فيضيع وقته هيهات إن هو يتمكن من
العلم بدون التمكن من حفظ القرآن.

لذلك كان موضوعنا النهاردة هو قضية حفظ القرآن فليس القضية فقط إنك تساعد
نفسك على طلب العلم لكن الموضوع أعلى من كده وأقوى من كده.

النبي عليه الصلاة والسلام يقول

"إن الذي ليس في جوفه شيء من القرآن كالبيت الخرب"



فلو إنسان ما يحمل شيء من القرآن في صدره فهو **خرابة ماشية** تمام؟.. وكل ما تزود حفظ القرآن بتعمر البيت ده أكثر .. فعمران البيت بقدر ما فيه من القرآن فإذا أراد الإنسان بيت عامر .. بيت عظيم يلقي به الله سبحانه وتعالى **فما أعظم من قلب حوى القرآن كاملاً؟**.. هذا أعلى ما يكون الإنسان يحمل كتاب الله سبحانه وتعالى .. إنه لا يوجد بعد ذلك هذا أعلى قلب .. أفضل قلب عامر .. أقوى قلب يلقي الله سبحانه وتعالى هو قلب حامل القرآن .. لذلك لا عجب أن يكون أهل القرآن هم أهل الله وخاصته هما دول أولياء الله سبحانه وتعالى حملة القرآن الذين يعملون بهذا القرآن ..

يبقى أنا بتكلم في حفظ القرآن على اعتبار إن ده عمران القلب وأصلاً هو الطريق إلى الله .. طريق قلوب صح .. مش طريق أبدان **هو أنا بسير إلى الله بقلبي ولا ببدي؟**.. **بسير بقلبي** .. وطبعي الإنسان يريد أن يلقي الله سبحانه وتعالى بقلب سليم .. قلب عامر .. يزداد كل يوم صلاح .. قلبه راحة باله والسكينة وغير ذلك .. فكان من المهم جداً أن ينشغل السائر إلى الله بحفظ القرآن سواء ختم أو ما ختمش يعني سواء الخطة بتاعته إنه يختم أو حتى مش هيختم **لكن ما ينفعش إن هو يبقى مش بيحفظ قرآن** .. يحضر دروس ويصلي ويروح مع الإخوة .. ويروح فين ويبجي منين .. طب إيه أخبار القرآن؟.. والله ما بحفظش .. طب القديم؟.. والله ما براجعش .. **طب إيه الكلام أنت عايش إزاي؟**

جاء رجل إلى عالم فقال له عايز ألازمك بقى واتعلم منك واقلدك وحاجات كده .. عايز يهتدي بهديه يعني ويتربى معاه يعني .. **فقال يا هذا أتحفظ القرآن؟**.. يعني أنت قبل ما تيجي لي كده وعايز علم وعايز تلازميني والكلام ده أنت حافظ قرآن بتحفظ القرآن؟ **فقال لا احفظ القرآن** .. **فقال الرجل وا غوثاه بالله .. واغوثاه بالله** .. طالب علم ولا تحفظ القرآن !!.. **اخبرني بالله عليك بأي شيء تتنعم وبأي شيء تترنم وكيف تناجي ربك؟**.. أنت جاي تعمل إيه؟ جاي تشتغل وجاي تتعلم وجاي تحضر دروس




وجاي تدعو إلى الله وأنت ما في بينك وبين القرآن عمار؟! طب أنت لما بتحب تنعم حياتك دي عايشها إزاي أنت حاسس بإيه؟ أنت عايش أصلاً بدون قرآن .. **بدون حفظ قرآن** .. بأي شيء تنعم؟! شوف الرجل يقول له بيقول له عايز الازمك يقول له أنت بتتنفس إيه؟! أنت عايش إزاي؟! أنت بتشرب إيه؟! **حياتك ماشية إزاي من غيره؟!** بأي شيء تنعم وبأي شيء تترنم؟! بتتغنى بإيه؟! وبأي شيء تناجي ربك؟! أنت بالليل بتقعد تعمل إيه في حياتك؟ جاي تطلب علم ليه؟.. كأن المعنى إن السلف عندهم موضوع إن بتحفظ القرآن ده شيء بديهي شيء أساسي **لصلاح الإيه؟ لصلاح القلوب** ..

يبقى أنا بتكلم في قضية أساسية .. **ليه أنا بتكلم في قضية القرآن؟ لأن الطريق إلى الله سبحانه وتعالى هدفه إيه؟ هدف الطريق في النهاية إيه؟.. الجنة .. أليس كذلك؟!!** وإذا كانت الجنة درجات يبقى من أساسيات الطريق المنافسة على تلك الدرجات .. ولا أعلم أحداً أرقى في الدرجات من حافظ القرآن .. لأن حافظ القرآن إذا كان عاملاً به هذا في أعلى المنازل في الجنة .. لأن النبي عليه الصلاة والسلام قال في الحديث المعروف

"يقال لصاحب القرآن اقرأ وارتقي ورتل فإن منزلتك عند آخر آية تقرأها"

هذا الحديث هو الذي أطار النوم من أعين السائرين في حفظ القرآن .. أنا أقول كيف يهنا لحافظ أو للسائر في حفظ القرآن بالنوم حين يقرأ هذا الحديث؟ **كيف يأتيك نوم وأنت مازلت هناك آية لا تحفظها؟..** أنت عارف إن في واحد جنبك معديك بآية إزاي أنت مستريح كده؟..

الحاجات اللي دفعت الواحد بفضل الله لحفظ كتاب ربنا سبحانه وتعالى بتوفيق الله هو هذا الحديث ليه **كيف ترضى أنت أن يكون أحد أفضل منك؟** كيف ترضى أن يرتقي أحد فوقك عند الله سبحانه وتعالى؟.. تبقى أنت مش قادر توقف لغاية ما توصل لآخر



آيه في القرآن ساعتها تبتي تستريح .. ومش هتستريح برضو إنك أنت لازم تراجع وتثبت .. هو مش هيستوي عند الله سبحانه وتعالى الي حفظه ويراجع مع الي حفظه وطنش وأهمل .. أكيد ربنا هيْفَرِّق ما بينهم .. أكيد هتبقى المكافأة مختلفة.

يبقى الموضوع مشروع حياة بعد ما اخلص القرآن اقعد اراجع وكل هدفي لا إن أنا ابقى لا يقال قارئ ولا الكلام الفارغ ده إنما هدفي بس هي اللقطة دي هي اللقطة دي إن أنا يوم القيامة اروح جايب القرآن كله كده من غير ولا غلطة .. تقول لي مش هغلط ولا غلطة؟! ده اجدع واحد بيغلط .. أيوه بس الموضوع مختلف .. ربنا هيثبتك يا أخي ..

يعني على قد ما أنت تعبت ربنا هيدريك يوم القيامة هتلاقي نفسك بتجيب القرآن كله من غير غلطة واحدة عارف كام درجة في الجنة 6236 درجة فيه كام مسافة بين الدرجة والدرجة دي؟ زي كده المسجد والدور الأول؟ .. لأ دا ما بين الدرجة والدرجة كما بين السماء والأرض .. يعني واحد أنت النهاردة حفظت "عَمَّ يَتَسَاءَلُونَ" ادي درجة وواحد عند "عَنِ النَّبِيِّ الْعَظِيمِ" هو دلوقتي عند الشمس "الَّذِي هُمْ فِيهِ مُخْتَلِفُونَ (3)" ده ما حدش شايفه بقي ..

الي تحت ده الي قاعد معايا هنا خلاص هو بدأ ما يشوفوش **لإن الفرق بينه آيتين** .. فبالتالي صاحبنا ده اختفى خلاص عن الي تحت ده .. تخيل بقي الي حافظ يعني مثلاً سورة مثلاً كسورة **عَمَّ** مثلاً هذا هنتكلم في اكثر من أربعين درجة .. سورة **عبس** الصفحة الواحدة دي أكثر من أربعين درجة من القرآن .. الي بيحفظ سورة **الحجر** تسعة وتسعين درجة .. يحفظ **البقرة** أكثر من متين درجة الموضوع كبير .. الآية موضوع الاية حاجة ضخمة جداً .. حاجة كبيرة .. تنقلك نقلة في الجنة غير عادية .. فبالتالي صعب إنسان فعلاً يكون يريد أن يصل إلى الله من أعلى درجات الرضا يبقى كده ريلاكس ولطيف وهادي وموضوع القرآن ده بالنسبة له مش شاغله .. حفظ القرآن



ده أصلاً مش في باله .. ختم القرآن دي أصلاً مش في الخطة .. هو أقصى درجات أحلامه يعني نحفظ شوية كده إيه نصلي بيهم وبتاع وخلاص .. ماشي هو ده مش بنقول حرام .. مش بنقول هيروح النار .. لكن دي مش همة أصحاب الهمم العالية .. أصحاب الهمم العالية بيطلبوا معالي الأمور .. ثم إن **حافظ القرآن هو أسعد الناس بالثواب** ليه؟ .. لأن حافظ القرآن لا يحتاج إلى مصحف فهو يقرأ القرآن في الطريق .. في المواصلات .. في المسجد .. في الشارع .. طالع البيت .. نازل من البيت .. بيتمشى في أي مكان يقرأ القرآن ..

لكن الثاني محتاج دايماً إلى مصحف .. مجرد ما البطارية فصلت من الموبايل هو فصل من القرآن .. مجرد ما نسي المصحف في البيت انتهى ما يقدرش يعمل حاجة لغاية ما يرجع .. **لكن الثاني ملوش دعوة بالدنيا دي** .. الموبايل بقى فصل مفصلش المصحف معايا مش معايا في أجزاء من القرآن حافظها كويس فبالتالي ممكن يقرأ في أي مكان وفي أي زمان معنى .. كده إن **الحسنات عنده شغالة نار** لأن الحرف بعشر حسنات ده أقل تقدير عارف يعني إيه الحرف بعشر حسنات حافظ القرآن بيقرأ الصفحة في قد إيه؟ بيقرأها في دقيقتين بالكثير على الأكثر ممكن دقيقة واحدة يكون خلص صفحة من القرآن ؟..**عارف صفحة من القرآن تساوي كم حسنة؟**

لو افترضنا إن القرآن في المصحف المدني 15 سطر مش كده؟ السطر فيه متوسط تمن كلمات بخمستاشر في ثمانية مية وعشرين مش كده؟ متوسط الكلمة خمس حروف يبقى مية وعشرين اضرب في خمسة .. **يبقى ست آلاف حسنة في دقيقة واحدة** صاحبنا بيقرأ قرآن جاب الصفحة في دقيقة .. **دقيقة واحدة خد ست آلاف حسنة** ..

طب لو جاب جزء بقى وهو بيتمشى كده ست آلاف في عشرين يبقى احنا بنتكلم في مية وعشرين **ألف حسنة** في جزء واحد كل ختمة لصاحبنا ده احنا بنتكلم بقى إيه دخلنا



في أرقام ضخمة جداً كل ما يخلص ثلاثين جزء بتتكلم في **ثلاثة مليون** و**ستميت حسنة** .. خاتم القرآن ده ممكن يجيب الختمة دي في أسبوع أو أسبوعين على الأكثر .. يعني كل أسبوعين كده بيلم له خمسة مليون حسنة كده إيه؟ على أقل تقدير .. لكن الثاني محتاج بقى مصحف وبتاع .. والدنيا بتكعبل معايا .. وأصل أنا لازم ابقى متوضي .. وأصل أنا لازم أصل أنا مش متوضي عارف الجوده .. لكن الثاني مش محتاج متوضي مش متوضي .. دي مش بتعطله أبداً في أي وقت .. في أي مكان .. في أي حالة فهو أسعد الناس بالثواب ..

ثم إن صاحب القرآن ينال الخيرية لأن النبي عليه الصلاة والسلام قال

"خيركم من تعلم القرآن وعلمه"

فالذي لا يتعلم القرآن ما يستطيع أن يعلم أحد .. آخره يقرأ لكن يتجراً إن هو يقعد طالب قدومه يعلمه ما يقدرش .. يقول لك معرفش أنا كويس إن أنا بقرأ قرآن .. لكن صاحبنا اللي بيقراً القرآن وليه شيخ وليه ورد .. وليه .. وليه .. أكيد هيعلم الناس .. ما فيش حد أكيد ختم القرآن ما علمش طفل .. ما علمش حد صغير .. **حتى لو ولد بسيط حفظه الفاتحة** .. **كم سيقراً هذا الطفل الفاتحة إلى أن يموت؟** .. هيعلمها لأولاده وأولاد أولاده وهلم جر فينال صاحبنا الخيرية من أوسع الأبواب .. خيركم من تعلم القرآن وعلمه .. **ثم صاحب القرآن ده هو أسعد الناس بقيام الليل** .. هو ليه الناس دايم بتكسل تقوم الليل .. تقولك هصلي بإيه .. ينفع امسك المصحف .. طب افتحه .. طب اقعد اقلب فيه .. طب أصل هتحرك كثير .. طب أنا أصل أنا عايز حامل .. أصل اجيب مصحف كبير ولا صغير .. طب لو شيلته في ايدي .. طب احطه .. طب اسجد بيه إزاي .. تكعبله بقى فبالتالي يعني يوم ما يصلي هيصلي بحاجة بسيطة وهيتعب ..



ثم إن هو مش يتلذذ بالصلاة ليه؟ لأن هو بيتعتع هو ماسك قعد يتهته في القراية فحاسس إن ما فيش جو صلاة .. هو قاعد بيحاول بس يقرأ صح .. لكن الثاني الي حافظ متمرن وقرأ على الشيخ ومرة واثنين عدى المرحلة دي خلاص .. هو دلوقتي يتدبر الموضوع بقى إن أنا بتعتع وبراجع والكلام ده وبخبط .. ما مفيش الكلام ده هو داخل على طول في جو عيش الصلاة بقى فأحسن واحد يصلي صاحبنا ده ...

وأطول واحد يصلي وأكثر واحد ما يزهقش ليه؟ لأن عنده هدف في الصلاة إن الصلاة بالنسبة له مراجعة بدل ما اراجع برة راجعت فين؟ في الصلاة صلي بجزء بقا صلي بجزئين هو بالنسبة له هو بيستفيد في كل الأحوال .

ليه مهم تحفظ القرآن؟ لأن حفظ القرآن بيخلي صاحب القرآن ده صاحب أصلح قلب .. لأن القرآن نزل شفاء لما في الصدور مش كده؟ .. شفاء لما في الصدور من الشبهات والشهوات وأمراض النفس وغير ذلك .. فصاحبنا معاه صيدلية جوه حافظ القرآن ده معاه إيه؟ صيدلية .. في صيدلية شايلها جوه أي مرض بيطلع إيه؟ يطلع الدوا خلص .

الموضوع الثاني الي ما عندوش جوا قرآن بقى معاه إيه؟ .. أنواع معينة من الأدوية على قد ما حافظ .. ممكن يجي له مرض ما عهوش الدواء بتاعه يتحير مش عارف إيه الآية الي تحل لي المشكلة دي إيه الآية الي اتذكرها فاستريح .. لكن الي حافظ قرآن أو الحافظ كمية كبيرة من القرآن يجد لكل مرض علاج ولكل شبهة رد ولكل شهوة رادع ولكل قلق آية تريح ولكل هم آية تزيجه وبالتالي يكون أسعد الناس بصلاح القلب .. اشفع صدر هو صاحب القرآن ده .

ممكن تقف مع واحد حافظ قرآن تقول له مشكلة كبيرة يروح مديك آية واحدة بس إيه ده كأنك أول مرة تسمع الآية دي أول مرة تقرأها في حياتك تقول له أنت جبتها منين دي؟ ما تعرفش هي جات له كده بركات بقى من عند ربنا من كتر ما هو يقرأ




وبيحفظ ويراجع ويتدبر ربنا بيكرمه في المواقف الصعبة قوي .. يديك
واحدة كده طلعتها منين .. ما تعرفش .. جت لك منين دي بقى .. بركة من
ربنا سبحانه وتعالى .. تحل مشكلتك .. ده أنت بتحل مشاكل الناس
بالآيات .. ما بالك بمشكلتك أنت الشخصية .. فهو أسعد الناس بالأمر
.. ده ..

ثم إن حافظ القرآن هو أبر الناس بوالديه وأكثر واحد يسعد به الوالدان
لأن النبي عليه الصلاة والسلام أخبر بأنه

"يجيء القرآن يوم القيامة كالرجل الشاحب، يقول لصاحبه: هل تعرفني؟ أنا
الذي كنتُ أسهر ليلك، وأظمئ هواجرِك، وإن كل تاجر من وراء تجارتِه، وأنا
لك اليوم من وراء كل تاجر، فيعطى الملك يمينه، والخلد بشماله، ويوضع على
رأسه تاج الوقار، ويكسى والداه حلّتين لا تقوم لهما الدنيا وما فيها، فيقولان:
يا رب، أنى لنا هذا؟ فيقال لهما: بتعليم ولدكما القرآن"

لو الدنيا كلها قعدت تفصل في الحلتين دول يعرفوش يعملوا زيهم .. فهما مش عارفين
فيقولون يا رب أنى لنا هذا فيقال تعليم ولدكما القرآن .. من أراد بر الوالدين يختم
القرآن .. أبوك مات .. أمك ربنا توفاهها بقي من برها أن تختم القرآن .. عايز تقدم لها
أعظم هدية يوم القيامة؟ .. عايزها تسامحك علي كل حاجة عملتها وحشة فيها؟ ..
عايزه يسامحك علي كل حاجة أذيته فيها قبل ما يموت؟ ... **اختم القرآن** .. ربنا يبارك
فيه ويجعله يرضى عنك رضى عجيب يوم القيامة لما يتقاله ابنك الي عمل كده .. كل
حاجة اتحلت خلاص .. كل حاجة اتحلت مع الوالدين حتى لو اخطأت .. حتى لو
ملحقتش يعني تحسن إليهم قبل الوفاة مازال هناك أمل طويل في الإحسان إلى الوالدين
بعد الوفاة .



حاجات كثير لو قلناها يعني مش هنخلص لكن **صاحب القرآن هو أسكن قلب** .. سكيينة غير عادية .. صلاح بال .. لأن صاحب القرآن هو أسعد الناس بالرحمة حين تنزل وبالسكيينة حين تغشى وبالملائكة حين تنزل لأنه صاحب قرآن ..

سيد بن خضير كان يقرأ القرآن من حفظه .. **طبعاً الصحابة ما كانش عندهم حاجة مكتوبة هو كله من الحفظ** .. فكان يقرأ وكان ابنه قاعد كده بيلعب على الأرض وفي الحصان بتاعه واقف .. فهو قاعد يقرأ .. يقرأ .. يقرأ .. مرة واحدة لقي الحصان إيه؟ .. **اتحرك كده .. فخاف يدوس على ابنه .. فسكت .. فلما سكت لقي حاجة كده ضلايه فوق طلعت واختفت فقلق** .. راح للنبي عليه الصلاة والسلام قاله حصل واحد اتنين تلاتة .. **قاله تلك السكيينة تنزلت عند قراءة القرآن** .. أسكن قلب قلب صاحب القرآن .. ده أقوى قلب في مواجهة الفتن والمحن .. كل بقى المشاكل اللي الإخوة بيشتكوا منها و الفتن والشبهات .. يا شيخنا والجو والمجتمع والبلايا والنساء .. كل الجو ده مش عند صاحبنا ده عنده حصانة من القصص دي كلها .. الله تعالى أسكن قلبه وأصلح إيه؟ وأصلح باله .. تحفُّه الملائكة .. تغشاه الرحمة .. الله دائماً ما يذكره عنده لأنه دائم الذكر لله .. **لأنه مش ممكن يكون حافظ قرآن كويس إلا لو بيراجع وهيراجع كل يوم** .. أد إيه هيراجع كل يوم مثلاً جزء ولا حاجة؟ .. شوف بقى بيذكر ربنا كم مرة وكام وقت؟ ربنا بيذكره كم مرة في اليوم؟ **فهو أسعد الناس بالإيه؟ .. بالقرآن .**

طيب علشان ما نتعطلش خلينا ننتقل النقلة الي جاية .. السؤال الأول لماذا لا تحفظ القرآن؟ .. الإجابة على محاور ...

الأول:-

لأنك لا تدري شرف ما تطلب وبالتالي ما عندكش عزيمة إنك أنت تطلب حفظ القرآن .. وضعف العزيمة هو فرع عن الجهل بشرف الشيء .. الإنسان مش عارف هو ترك إيه؟ فتضعف عزمته .. فالأول لازم تعرف فضل الشيء ده بالتالي تتكون الإيه؟ .. الرغبة فيه وبالتالي تتكون الإرادة.

والجزء الأول اللي أنا قلته لغاية دلوقتي المفترض إن هو يرفع الهمة في طلب هذا الأمر .. كل ما تجدد على ذهنك الإيه؟ .. الغايات المحموده اللي أنا ذكرتها دي .. كل ما تجد في نفسك رغبة شديدة إنك تحفظ القرآن وبعد كده الهمة تقل .. بعد كده تذكر نفسك تاني بعد كده الهمة تقل .. تذكر نفسك تالت .. وتبعد تذكر نفسك بالغايات المحموده دي تجدد كل شوية الهمة تزيد .. لكن عايز تحفظ قرآن ليه أصل الشيخ بيقول لي لازم تيجي تحفظ .. أصل المفروض احفظ .. أصل فيه مسابقة الجوده إيه؟ فكك منه .. مش هيجي معاك..

لن ينفعك إلا الإخلاص لوجه الله سبحانه وتعالى أن يكون رضا الله هو الغاية .. لأن رضا الله هي الحاجة الوحيدة اللي لا بتروح ولا بتيجي هي هي .. لا تبعد لا تفنى لا تتغير .. ترضي ربنا النهاردة ترضي ربنا بكره .. لكن النهاردة الشيخ مشجعني .. بكره في مسابقة .. النهاردة عاملين في المسجد مش عارف مين اللي هيحفظ .. الجوده كله بيتغير .. الشيخ هيمشي .. الشيخ هيموت .. المسابقة مش عارف هتخسر المسابقة .. تبطل؟ .. ما هو واحد هيكسب والباقي هيبطلوا حفظ .. واللي كسب بعد ما كسب ريح ليه؟ .. ما كسبت خلاص عمرك ما هتكمل لأن الهدف مش واضح .. لأن الرغبة محدودة ..

لكن إذا كانت الرغبة في الأمور اللي أنا ذكرتها فهي رغبة ليست محدودة.

التاني:-

اليأس .. الإجابة الثانية ما بحفظش ليه؟ .. **علشان ما عنديش خطة** ده بقى
الي هنتكلم عنه بقى دلوقتي ...

تلاتة:-

مبتحفظش ليه؟ **ما فيش شيخ يحفظني** .. مفيش شيخ دي ممكن تبقى علة
مش حقيقية .. يعني إن بعض الناس لما بيحي يحفظ قرآن يعني بيبقى عايز إيه شيخ
جامد قوي يعني .. شيخ مشهور مثلاً .. أو عايز مثلاً إيه الشيخ المعروف في المنطقة هو
الي يحفظه مثلاً .. بس يجي يقول لي عايزك يا شيخ أنت تحفظني .. طب أنا مش فاضي
.. يروح مش هيحفظ .. **طب في أحد أحسن مني في القرآن أنا بدعوا إلى الله مثلاً** .. مين
قال لك إن أنا أحسن واحد في القرآن أنا بقول لك في واحد كويس فلان روح فلان
.. لا لا أنا عايز احفظ معاك أنت لا ده دلح بقى أنت مش عايز تحفظ قرآن أنت عايز
تبقى إيه يبقى الشيخ علاء يتبسط بيك ..

أنت مش هترضي ربنا كده أنت بترضي هواك .. هو يا شيخ علاء يا مش حافظ قرآن
.. طب وبعدين .. يا الشيخ فلان يا مش هروح .. لازم المشهور .. لازم يبقى اسمه أنا
بحفظ مع الشيخ فلان .. ما في ناس كتير مغمورين لا يعرفهم أحد وهم أحفظ الناس
لكتاب الله وأقوى الناس في التجويد وأقوى الناس في القرآن اسأل .. وكمان أنصحك
أما تيجي تحفظ قرآن في الزمن ده بالذات دور على المغمور .. لأن ده الي فاضي ..
هتعرف تكمل معاه .. مش هيحصل له ظروف .. التاني المشهور ده بيسافر وبيعتذر
وبيروح وبيجي وبيتكعبل وبيتلغبط .. تفضل أنت يا عيني رايح وجاي معاه وتلاقي
بدل ما تحتّم في سنتين تحتّم في أربعة وفي عشرة بسبب الشيخ كل شوية يعتذر وكل شوية
وكل شوية يتأخر .. **دعك من المشاهير في البداية** .. يعني لما تيجي تحفظ قرآن في البداية
ما تروحش للمشاهير .



ابدأ الأول بواحد متقن مغمور ما حدش يعرفه كثير يعني والزق فيه خلص معاه .. بقى بعد ما تخلص روح بقى للمشهور ده بقى إيه على مزاجك بقى موراكش حاجة بقى خلاص خلصنا القرآن .. روح بقى للمشهور بقى وخذ إجازة وإجازتين وتلاتة وعشرة .. **لكن في بداية حفظك للقرآن مترو حش للناس المشغولين قوي دول هيعطلوك.**

أنا أذكر إني أنا بدأت طريقي مع أخ يمكن يكاد يكون مش معروف إلا يعرفه عدد قليل من الناس .. لكن بفضل الله يكاد يكون لم يعتذر لي قط وثبتنا للآخر .. وأنا شوفت ناس في نفس المرحلة اللي حفظت فيها ناس ما عجبهمش عايز يروح للشيخ الفلاني والشيخ العلاني .. قلت لهم يا إخوانا اصبروا خلص بعد كده روح لفلان وعلان راحوا ولا واحد فيهم دلوقتي خلص ولا حاجة .. والشيخ ده جابه كده والشيخ ده آخره والشيخ ده عطله والشيخ ده سافر والشيخ ده مات والشيخ ده عزل .. **وبعدين طب ما ده كان قدامك يا عم الحج.**

وكان في ناس بتحفظ معايا بردو اقول لهم نفس الكلام اقول له يا عم خلص معايا وبعد كده إيه شوف أنت عايز تروح فين لا هو بقى يقول لك هروح للشيخ إيه فلان مشهور ومسمع وبتاع يروح تعطل وإلى الآن قاعد يلف وخلاص على شيوخ كان زمانك خلصت .. خلص وبعد كده روح بقى نقى على مزاجك ما أنت ختمت .. اتسلى بقى روح خد إجازات زي ما أنت عايز .

مسألة إن ما فيش شيخ دي وهم أكيد في كل منطقة في أخ حافظ مش لازم يكون خاتم .. أنت دلوقتي مبتدأ يكفيك إن في واحد متقن للقراءة وحافظ مثلاً خمس عشر أجزاء كويس خذ اللي عنده على ما تخلص اللي عنده ربنا يفتح عليك تلاقي ثاني وتالت ورابع .. يعني الدنيا مش بتقف بل في دلوقتي على أنت في صفحات لتحفيظ القرآن وفي على الواتساب مجموعات لتحفيظ القرآن يعني لو أنت مش لاقى خالص هتخش على صفحات الفيس أو المواقع اللي فيها كده أو صفحات الواتس أو جروبات الواتس اللي



فيها كده .. بتقعد تقرأ والشيخ بيسمع ويرد عليك ويقول لك اخطائك .. الدنيا مش هتقف **الي عايز حاجة هيعملها من الآخر** .. لكن موضوع إن أنا عايز احط شماعه وخلاص سهلة .. أصل مفيش شيخ .. أصل الشيخ بيعتذر .. أغيره .. خلاص .. طيب بعد كده يقول لك أصل الدراسة غلط...

بالعكس **أحسن وقت تحفظ فيه قرآن وقت الدراسة** ليه؟ .. اسأل الي خلص دراسة قول له قول له النظام إيه؟ يقول لك دماغى وقفت .. **الي في الدراسة مخه شغال** يا إخواننا .. دماغه شغالة كويس .. فبالتالي حط فيها أي حاجة إيه هتدوس معاك .. هتجيب معاك .. لأن المكنة شغالة لكن أنت خلصت النهاردة عايز تأجل حفظك لغاية ما تخلص دراسة هتلاقي المكنة دي ريحت منك تيجي تحفظ مش جاية معاك يعني حفظك في الدراسة وأنت مشغول بالدراسة كان أحسن من حفظك بعد ما خلصت وريحت .. شوف بقى أخ كده عايز يحفظ في الجيش مثلاً لو عايز يحفظ بعد الجواز أمر مرهق جداً .. لكن تجد أغلب يكاد يكون أغلب الي حافظ القرآن حفظوه في الفترة دي الثانوية والكلية بعد الكلية ..

تلاقي أصلاً طلب العلم نفسه أنت مش قادر خلاص أسعد لحظة أسعد أوقاتك في طلب العلم وفي حفظ القرآن هي كانت الفترة الي أنت فاكرها صعبة دي **ليه؟** لأن أصلاً هي كل حاجة سريعة تلاقي طالب الثانوية ولا الكلية ممكن يحفظ صفحة القرآن في ثلث ساعة .. هات كده واحد متجوز .. ولا مريح بقى له مدة من الدراسة تلاقي يقعد يفكر كده بالساعة في الصفحة مش عايزه تتحفظ .. فكان حفظه أيام الدراسة أسهل بكثير مش كده؟ ... تمام.

بعد كده بنقول خلاص أنت لقيت محفظ ثبت بقى معاه محفظ ثبتته متحاولش تغيره كثير تمام؟ .. أو متغيروش وده أفضل يكون عنده وقت .. والوقت متاح وياريت تختار معاه أوقات يبقى ما فيها ش حد وتبقى أنت مع نفسك وبتاع الفجر مثلاً بحيث إن مفيش



حاجة هتعطلك أبداً .. لقيت الشيخ معاه مجموعة إنضم للمجموعة دي المجموعة دي كويسة وبتنجز خليك معاهم ..

المجموعة دي مبتنجزش والشيخ مضطرب مشي على قوة أضعف واحد فيهم **سبب المجموعة فوراً ..**

بمعنى مثلاً جم ناس حافظين فالشيخ اضطر يراجع الحاجات القديمة وقال معلى طب خلاص إيه نأجل حفظ دي عشان الناس دي تحفظها .. وكل شوية إيه تتكعبل أنت بسبب إن نص المجموعة كسلانين و مش بيحفظوا .. فر من هذه المجموعة .. قول للشيخ أنا مش عايز المجموعة دي عايز مجموع يا إما ناس متميزين أو أنا اجيلك في وقت لوحدي ومع نفسي وتحفظني .. **لكن موضوع إن أنت تتعطل بسبب الناس دي مشكلة كبيرة ..**

أنا أذكر الي حصل أنا انضمت للمجموعة في البداية لقيتهم بقى إيه كل شوية واحد يعتذر .. واحد يتأخر .. يا شيخ مع نفسي مش هينفع معايا الجوده أنا هحفظ معاك أنت لوحدك بفضل الله سبحانه وتعالى خلاص مقاطعناش أنا وهو إلى أن اتتمنا حفظ القرآن بفضل الله جل في علاه .

طيب تعالى نخش على طول على النصائح ونشوف الدنيا تمشي إزاي معانا احنا اتكلمنا على التلات أسباب صح الي هو

ضعف الهمة ناتج عن جهلك بشرف ما تطلب ..

موضوع الشيخ والوهم الي حوالين موضوع الشيخ ده ..

فاضل **الخطه** بقى و دي أهم حاجة هنعلم بها القرآن إزاي .



لازم قبل ما نتكلم في الخطة نتكلم في موضوعين أساسيين أول موضوع إنك أنت لن تستطيع أن تستمر في هذا الطريق حتي تحب الله سبحانه وتعالى فإذا أحبيت الله حقاً أحبيت كلامه ..

وإذا أحبيت كلامه لم يهنأ لك نوم حتى تحفظ كلام الله سبحانه وتعالى تبقى
مش مستريح لغاية ما تخلص الكلام ده .. لأنك بتحب ربنا والقرآن هو كلام الله ..

هذه رسائل هذا الحبيب إليك واحد يحبك قوي وأنت بتحبه قوي وبعثلك رسائل ..
تقراها كام مرة هتبقى عايز تاكلها أكل عايز تبصمها وتحفظها لإنك بتحبه هو شخصياً ..

فالأول لازم في حاجات كده عوامل بعيدة مساعدة أن تملأ قلبك بحب الله وده موضوع طويل لكن أنا بديك إشارة وتملاً قلبك بحب القرآن وده فرع عن **حب الله** سبحانه وتعالى وأن تهتم جدا في أول الطريق وفي وسط الطريق وفي آخر الطريق بهذا الدعاء العظيم

"اللهم إني أنا عبدك وابن عبدك وابن امتك ناصيتي بيدك ماضٍ في حكمك عدلٌ في قضائك اسألك بكل اسمٍ هو لك سميت به نفسك أو أنزلته في كتابك أو علمته أحداً من خلقك أو استأثرت به في علم الغيب عندك أن تجعل القرآن العظيم ربيع قلبي ونور صدري وجلاء همي وذهاب غمي وحزني"

إدمان بقى الدعاء ده إدمان ... من أول الطريق إلى آخر الطريق مع إدمان الدعاء بختم القرآن إنك دايماً تدعي بالموضوع ده وتستغل المواسم الفاضلة يوم عرفة، رحت الحرم، رمضان، ليلة القدر، العشر الأواخر، خلي الدعاء ده ملازم ليك **بس يكون فعلاً ربنا**



يرى فيك صدق .. مش يلا يلا ندعي يا رب اختتم القرآن ولا في أي أصلاً
خطة ولا ناوي ولا أي حاجة .. لا الموضوع لازم يبقى إيه فعلاً محروق زي
كده ..

عارف أنت ليلة امتحان الفيزيا؟... هو الجو ده تواشبح بقى اللي أنت
بتعملها دي بقى .. فاهم؟... صلاة الفجر العشرين ركعة اللي بتصليهم ..
جو بقى بترضي ربنا بقى على الآخر بقي هو ده الذل بقى اللي بيحصلك في
الليلة دي .. يا رب .. يا رب مليش غيرك .. يا رب أنا مفتحتهاش بس أنت على كل
شيء قدير يا رب ورقتي تتلغبط مع اللي جنبني كده ..

عايز بقى إيه موت بقى وبكاء وتضرع وصلاة وحاجات كتير زي ما أنت بتعمل في
الإيه في الإمتحانات دي لما بتبقى مزنوق قوي وأنت رايح تشوف النتيجة تدعي إزاي
هو ده **لو دعيت الدعاء ده عشان تختتم قرآن ممكن تختمه في شهر بالطريقة دي لإن الدعاء**
بيبقى من قلبك فعلاً يعني .. تمام؟..

أنا أحب احكي لكم من باب الاعتراف بالمنة يعني بفضل الله سبحانه وتعالى فأنا لا
أنسى هذا اليوم يوم عرفة أذكره يعني كأني أراه الآن فعلاً الأمر ده.

يعني الإنسان طلبه من ربنا فعلاً بقوة شديدة وأذكر المكان والزمان ومين كان قاعد
جمبي في هذا اليوم كان في مسجد يعني كنا قاعدين وأنا طلبت هذا الأمر يعني فعلاً
كنت حريص عليه بفضل الله سبحانه وتعالى الأمر لم يتجاوز الستين والنصف يعني
الإنسان يعني **إن تصدق الله يصدقك .. ماشي؟...**

خلينا نكمل المسألة الثانية قبل ما نبدأ الخطوة .. **الإخلاص** أن تطلب وجه الله سبحانه
وتعالى **الإخلاص ثم الإخلاص ثم الإخلاص** .. في كل مرحلة من مراحل حفظك
للقرآن انسى الناس ... أتعس الناس من يحفظ القرآن ليلقى في الجحيم فيقال له يوم




القيامة إنما قرأت ليقال قارئ فقد قيل ذلك .. هذا أشقى الناس هذا أول رجل يلقي في الجحيم أول من تسعر بهم النار يوم القيامة .. رجل جمع القرآن ثم قال له رب العزة لم قرأت القرآن؟ .. قال ربي قرأته فيك كنت أقوم به آناء الليل وأطراف النهار .. قال **كذبت** إنما قرأت ليقال قارئ فقد قيل ذلك اذهبوا به إلى الجحيم .. فإياك أن يكون القرآن سلمك إلى الجحيم بدل أن يقال لك إقرأ وارتنق ورتل .. يقال لك انطلق إلى الجحيم إنما قرأت ليقال عنك قارئ ..

انسى الناس حلاوة الصوت بقى ويقولوا عليا والجوده ويقولو عليا خاتم وكل ما تقابل حد تقول له أنا بحفظ أد إيه .. انسى الكلام ده أنت تعامل رب العالمين أنت تعطى مكافآت لا يملكها أحد من أهل الأرض ... **فاحتقر الناس** واحتقر ما عندهم واحتقر نظرهم إليك ولا تبالي بهم .. أنت تطلب أمراً هائلاً عظيماً دعك من الناس ولا تفكر فيما عندهم من الثناء والمديح .. هذا الكلام ده ملوش أي لزمة الي يمدحك النهاردة يذمك بكرة ..

إنما كما جاء رجل إلى النبي عليه الصلاة والسلام قال يا محمد إن مدحي زين وذمي شين فقال النبي ذاك الله الي مدحه زين هو الله والي ذمه شين هو الله .. الناس بقى مش مهم يمدحوا يذموا مش مهم الكلام ده يستوي عندك الي يذمك والي يمدحك . واحد يقول لك أنت قاعد تضع وقتك في حفظ القرآن زي الي بيقول لك الله ينور ياعم الشيخ إيه الحلاوة دي الاتنين عندك زي بعض مش مهم المهم ربنا يكون راضي عنك .. تمام؟ ... يلا بينا ننطلق

هنتكلم في **خطة اقتراح** .. هنحط خطة تصورية ونحط بقى حوالها النصايح كلها من خلال بقى كل الي قابلته في حياتي .. من خلال الي قابلته والي قرأته والي واجهته والي عانيته أنا في حياتي نفسها في حفظ القرآن .. هديك الفائدة الخطة دي ممكن يبقى فيها تعديلات هقولك إزاي ..



احنا نفترض الخطة هتمشي كالاتي إن **أنا هحفظ كل يوم صفحة** .. صفحة من القرآن هي الخطة .. هتمشي إزاي الهدف؟ .. إني أنا هحفظ كل أسبوع خمس صفحات الي هما حوالي ربعين الخطة هتمشي إن أنا كل يوم هحفظ الصفحة ..

الي يكتب ممكن يكتب بطريقته مش لازم تكتب نفس الكلام الي أنا بقوله ممكن تكتب زي ما أنت فهمت يعني مش مهم ..

انما تجمع النصائح في الآخر وبعدين أنت تكيفها على ظروفك .. **هحفظ كل يوم صفحة** .. ليه بقول خمس صفحات في الأسبوع لأن أنا هحفظ كل يوم صفحة لمدة خمس أيام بس اليوم السادس واليوم السابع مخصصين لمراجعة الخمس صفحات .. وهنفترض إن الخطة دي أنت بتقابل الشيخ مرة واحدة في الأسبوع هتسمعه ربعين أو الخمس صفحات دول يبقى لقاء الشيخ هيكون في اليوم السابع ..

اليوم السابع هتقابل فيه الشيخ .. فلو أنت بتقابل يوم الثلاث فأسبوعك لبدأ يوم إيه الأربع أسبوعك ببدأ الأربع أول صفحة هتحفظها الأربع تحفظ الأربع والخميس والجمعة والسبت والحد بس الاثنين والثلاث مراجعة .. هتروح للشيخ سمعت هترجع تحفظ خمس صفحات وبعدين دايا آخر يومين في الأسبوع دول لمراجعة آخر الخمس صفحات .. يبقى ده الحفظ هنقول هتحفظ إزاي وهترجع إزاي بس واحدة واحدة ..

طبعا الوقت الي أنت خصصته لحفظ الصفحة ده أثناء اليوم الي هو متوسط من نص ساعة مثلا لساعة إلا تلت هو نفس الوقت الي هتخصصه لمراجعة الخمس صفحات احنا مش هنزود حاجة بس أنت الصفحات لسه طازة يعني أنت في الساعة إلا ربع أو ساعة إلا تلت لو خليتهم ساعة مثلا في اليومين الي فاضلين ممكن تراجع الخمس صفحات يتراجعوا في ربع ساعة بالكثير هيتراجعوا مثلا كل يوم هتراجعهم ثلاث أربع



مرات ثلاث أربع مرات **وياريت يبقوا في أوقات متفرقة** على اليوم يعني ربع ساعة هنا ربع ساعة هنا ربع ساعة هنا ..

خلاص كده اليوم السادس اليوم السابع هتراجع برضه الخمس صفحات ثلاث أربع مرات في أوقات متفرقة لغاية ماتقابل الشيخ يبقى أنت قابلت الشيخ كنت أنت حفظت الصفحات الخمسة وراجعتهم حوالي ثمان مرات قبل ماتقابلة أصلاً التمن مرات على أوقات متفرقة مستحيل تغلط قدام الشيخ بقا دلوقتي هنقول ليه بس امشي معايا واحدة واحدة يبقى ده الحفظ ودي مراجعة الورد القريب **الي هو الإيه؟** الخمس صفحات **الي أنا بحفظهم** بالتوازي كل يوم ليك مراجعة للقديم ..

يبقى لو مبتدئ مش هيلاقى قديم يعني لسه بادئ يحفظ النهاردة ما فيش قديم لكن افترض واحد متقدم شوية حافظ جزء جزئين أو ثلاثة عنده قديم القديم ده **بیراجعه إزاي؟..**

بسيطة جدا .. القديم ده قد إيه اقسمه على سبعة .. هو ده وردك اليومي .. أنا عايز أراجع وردي في قد إيه سبع أيام أنا دائماً نثبت السبع أيام دول هم الحفظ هم المراجعة هراجع القديم في أد إيه سبع أيام السبع أيام دول هراجع أد إيه مقدرش اقولك تراجع أد إيه أنت الي عارف أنت حافظ أد إيه اقسمه على سبعة هو ده ورد اليوم الواحد ..

تعالى نفترض افترض واحد دلوقتي حافظ اتنين واربعين صفحة من القرآن يبقى النهارده هبدأ في صفحة كام ثلاثة وأربعين هيحفظ من ثلاثة وأربعين لكam الأسبوع ده من ثلاثة وأربعين لسبعة وأربعين صح؟ طيب المفروض تراجع قد إيه في اليوم؟ اتنين وأربعين على سبعة يساوي ستة المفروض كل يوم تراجع كام صفحة؟ ست صفحات ..



يفضل على كده لغاية ما يوصل لصفحة تسعة واربعين اللي هي سبعة جديدة أهى يفضل مثبت الست صفحات لغاية ما يوصل لصفحة تسعة وأربعين في الحفظ أول ما يوصل لصفحة تسعة واربعين هيخلي الورد اليومي قد إيه سبع صفحات هيوصل لصفحة ستة وخمسين يبدأ الورد الورد اليومي قد إيه تمن صفحات وهكذا ..

لو واحد حافظ المية وأربعين صفحة من القرآن ورده أد إيه دلوقتي عشرين صفحة كل يوم يراجع عشرين صفحة وهو لسه احنا مثبتين الحفظ بيحفظ أد إيه في اليوم صفحة واحدة لمدة خمس أيام اخر يومين بيراجعهم قبل ما يروح للشيخ .. تمام؟ ..

هتقول لي أنا هحفظ أراجع جزء في اليوم صعب جداً .. ما تبصش دلوقتي للمرحلة دي لو أنت دلوقتي بتقيس نفسك على وضعك ده في المرحلة دي هتقول إيه ده أنا أراجع جزء في قد إيه في ثلاث أربع ساعات ساعتها الوضع هيبقى مختلف .. أنت حفظت قد إيه وراجعت قد إيه هتلاقي الموضوع سهل يعني .. هتلاقي مثلاً الوقت اللي كنت بتراجع فيه خمس صفحات هو نفسه اللي هتراجع فيه عشر صفحات هو نفسه اللي هتراجع فيه جزء بعد كده هيبقى فيه خبرة بعد كده خلاص ..

أنت كنت بالتعنت في الأول كنت بتجيب الخمس صفحات دول في إيه؟ في نص ساعة بعد كده هتجيب الجزء في نص ساعة ف ما تقلقش من الموضوع ده ما تفكرش فيه دلوقتي خليها بظروفها كل أنت ما تكبر كل ما ربنا يبارك .

كان أحد السلف يقول: "ما زلت أزيد وردي في القرآن وما زال الله يزيد البركة في وقتي وأنا اليوم أراجع عشر اجزاء في اليوم والليلة"

يراجع عشرة أجزاء في اليوم ويقول حياتي ما اتأثرتش حياتي ما اتأثرتش بمراجعة عشر أجزاء في اليوم .. تمام؟ ..



خلاص يبقى احنا وصلنا إن لو واحد حافظ مية وأربعين صفحة يبقى هو بيحفظ كل يوم صفحة بيراجع آخر يومين في الأسبوع بيروح للشيخ وكل يوم بيراجع قد إيه؟ عشرين صفحة.

هنحط حته كمان .. مهم إنك أنت بالتوازي مع كل الي أنا قلته ده إنك تقرأ .. يبقى ليك ختمة قراءة كل يوم على الأقل جزء كل يوم ..

على الأقل إيه؟ جزء ختمة قراءة ما لهاش دعوة لا بالمراجعة ولا بالحفظ إيه فايدتها؟ ..

فايدتها إن هي **أولا بتعرفك على الأجزاء الي أنت لسه هت حفظها بعدين ..** بتخليك إيه تتعرف عليها .. على ما توصل لها بتبقى ساعتها سهلة بتلاقيها سهلة في الحفظ لكن أنت يا دوبك حفظك ومراجعتك كل ما تقابل حاجة تتحفظ فتحس إن هي جديدة خالص أول مرة تشوفها في حياتك لكن لو أنت ليك ختمات شغالة بالتوازي مع الحفظ والمراجعة كل ما تيجي تحفظ جديد بتلاقي نفسك إيه فاكره كده عدت عليه يعني .. **فبالتالي حفظه بيكون سهل ..**

يبقى لازم بالتوازي يبقى أنا عندي في اليوم بيحصل كام حاجة بيحصل واحد في الخمس أيام الأولانيين حفظ صفحة مراجعة سُبْع الي أنا حافظه قراءة جزء دي علاقتك مع القرآن حفظ مراجعة قراءة ..

طيب هتقول لي أنا وقتي ما يسمحش .. ما أنا قلت لك أنت ممكن تكيف الي أنا بقوله ده على نظامك .. ممكن نخلي الصفحة دي كام نص صفحة بس وقيس بقي واحسب على كده مش مهم بس أنا بفترض الوسط أصل في ناس بيحفظوا صفحتين أنا افترضت الوسط أقل من كده في نص أعلى من كده في اتنين نفس الكلام الي أنا بقوله بس أنا بديك مثال وسطي أو الي أنا جربته لأن أنا تقريباً مشيت بنفس النظام ده صفحة مراجعة سُبْع المحفوظ القديم قراءة جزء على الأقل وفي اليومين الي هما الاخرانيين



بتوع الأسبوع هيبقى مراجعة الخمس صفحات زائد مراجعة سُبُع القديم
زائد جزء على الأقل في الإيه؟ ... في القراءة.

تعالى نكمل خلاص احنا عرفنا احنا بنعمل إيه .. تعالى بقى نديك شوية
نصائح..

واحد:-

احنا عندنا دلوقتي تلت حاجات قلنا **حفظ ومراجعة وقراءة**.

لو أنا عندي اليوم في أوقات متاحة هشوف الأوقات المتاحة دي اللي أنا هحط فيها
القرآن اختار **أصفى وقت وأنقى وقت** لإيه **للحفظ** .. الوقت اللي بعده يبقى الإيه
للمراجعة .. الوقت اللي بعده يبقى الإيه **للقراءة** يعني لو أنا عندي في اليوم أوقات
فاضية فيهم وقت أنا ببقى مركز فيه أوي .. وفي وقت ببقى مركز فيه مش قوي ..
ووقت مش مركز فيه .. فخلي اللي مركز فيه قوي ده **للحفظ** .. اللي بعده **للمراجعة** ..
الي بعده **للقراءة** ..

يعني **في المواصلات تعمل إيه؟ .. تقرأ** .. المواصلات يا جماعة ما تنفesh تحفظ فيها
قرآن .. ما فيش حاجة اسمها حفظ القرآن في الشارع وفي المواصلات وعلي السلم
الكلام ده ما انصحكش بيه هتلاقي الربع تحس إن هو إيه نفس الجو اللي كنت عايش
فيه هتحس إن الربع ده كل ما تيجي تراجع فيه حاجة غريبة فيه حاسس الربع ده
مكعبل معايا كده مش عارف ليه .. لأن أنت حفظته كده حبه في المشروع وحنة علي
السلم وحنة في المدرج فتحس الربع ده كده...

لكن فيه واحد حفظ المصحف كان في المسجد باصص في الحيلة بعد الفجر مركز
مافيش أي حاجة حواله .. حفظ خلص يحس إن الربع ده **سكينة** كده مش عارف
الربع ده بحبه أوي هو فيه ارتباط ذهني عنده هو مش حاسس بيه بين المود الي حفظه
فيه وبين إحساسه مع الربع ده أو الصفحة دي ..



فدايها خلي المود أحسن مود عندك .. بمعنى زي ما أنا قولتلك أنا لا أنصح بالحفظ في المواصلات .. المواصلات تنفع للقراءة ولو متضرر أوي ممكن تراجع فيها المحفوظ الكويس لأن أنا دلوقتي القديم في حاجات كويسة و حاجات واقعة مني .. صح ينفع المواصلات لحاجتين عموماً المواصلات أو غيرها اللي هي الحاجات المكعبة شويه تنفع للقراءة وتنفع لمراجعة القديم الكويس اللي هو مثبت شوية ..

لكن حفظ جديد أو مراجعة قديم واقع **ما ينفعش أبداً** في الجو ده لازم يبقى في جو هادي جداً مركز جداً .. مهياً جداً علشان حفظك هيتأثر نفسياً بالمود ده وعلشان المراجعة اللي هي واقعة مش ناقصة تقع أكثر من كده لأنك أنت لو راجعتها في الجو ده هتغلط كثير قوي أكثر من الغلطات اللي كنت هتغلطها في العادي ..

يعني أنا مثلاً بغلط في الصفحة عشر غلطات لو راجعتها في الشارع وكده هتغلط عشرين غلطة في عشرة مكنش هتغلط فيهم بس علشان أنت راجعت في الكعبة .. ديت نصيحة يعني لكن فيه ناس بيعرفوا يحفظوا بس معرفش إزاي.

طيب النصيحة اللي بعد كده يوم من الأيام حصل تعارض في وقتك مبقاش فيه وقت للتلات حاجات دول هنبتي نرتب أهميتها **إيه أهم حاجة في اللي أنا قولتهم؟..**

المراجعة...

عكس خد بالك أنا في الصفاء الذهني اختارت مين الأول الحفظ لأن ده جديد ده أول مرة اقابله والمراجعة ممكن نیجي عليها شويه لكن لو أنا عندي اختيارات في اليوم یا الحفظ یا المراجعة یا القراءة .. نمرة واحد اختار إيه؟ .. **المراجعة** .. عصفور في اليد خير من عشرة على الشجرة .. إنك أنت تمسك اللي معاك أحسن من إن أنت عندك لا القديم ولا الجديد لحقته .. لو حصل اليوم مكعبل مفیش وقت غیر لحاجة واحدة منهم نمرة واحد تعمل **المراجعة**.



نمرة اتنين في وقت اجيب **الحفظ** .. نمرة تلاتة **القراءة** .. يعني لو ضحيت هضحى الأول بالقراءة ثم الحفظ .. لكن المراجعة دي مينفعش اضحي بيها أبداً ..

قاعدة بعد كده وأنا بحفظ بقي احفظ إزاي؟..

وأنت بتحفظ هقولك طريقة جميلة احنا قولنا أنت هتحفظ بقي وأنت مركز وانت في البيت أو المسجد أو كده .. لما تحفظ يبقى جنبك تسجيل أو موبايل أو كده هتشغل عليه الحاجة الي أنت هتحفظها لسبب هقولهولك دلوقتي .. لما تيجي تحفظ أول **حاجة هتمسك الصفحة** .. احنا قولنا صفحة مش كده .. هتقرأ الصفحة دي كذا مرة كثير **هتقرأها مثلاً لمدة عشر دقائق** .. تقراها مثلاً سبع ثمرات بس وبعد كده لمدة خمس دقائق تحاول تقراها تاني من غير ماتبص ..

هتغلط كثير مش مهم يعني تحاول تجيب الي تجيبه .. بعد كده مثلاً خمستاشر دقيقة عشرين دقيقة في الجو ده كده أنت حفظتها بالشبه وقولتها كثير فبدأت تعرف أنت بتقولها إزاي بالظبط .. تبتي تسمعها بقا اسمعها وطلع غلطاتك و بعد كده وقف شكراً ثبت بقا بعد ما تكون صلحت غلطاتك.

تقولي إيه الفرق ينفع اسمعها قبلها؟..

هقولك الفرق لو سمعت الصفحة دي قبل ما تكون قررتها مش **هتعرف أصلاً أنت كنت هتغلط في إيه ..**

فممكن تسمعها وتبقى سمعتها كويس جداً وتيجي تحفظ .. تحفظ غلط برضو لأنك أنت أصلاً سمعتها قبل صح الحاجة الثانية لا هسمعها بعد .. يعني أنت حفظت الصفحة وثبتها وبعد كده جيت سمعت طلعت الأخطاء .. حليتها .. لكن لما تاجي تراجع بعدين هتغلط نفس الغلطة ليه لأنك أنت ثبت على الغلط .. فعندي مشكلتين تسمع قبل .. ما اضمنش إن أنت هتعرف الغلطة فين .. تسمع بعد هتعرف الغلطة فين



بس احتمال لما تيجي تراجع بسرعة هتغلط نفس الغلطة تاني علشان أنت
ثبّت علي إيه؟ .. على كده ..

أحسن حاجة مثالي إنك تسمع ما بين الاتنين إنك أنت تقرا الصفحة تثبتها
نص تثبت تسمعها تعرف أنت غلطت في إيه .. ثبّت .. عمرك ما هتنسى
الموضوع ده تاني..

لما اجي احفظ الصفحة بقى حفظ بقى **احفظها إزاي؟** ..

في ناس يقدر يحفظ صفحة على بعضها يقعد يجيبها كتير لغاية ما يحفظها .. وفيه ناس
تقولك لأ صعب هقسمها علي جزئين أو ثلاثة ..

مش مشكلة عندي قسمها جزئين ثلاثة المهم إن أنت تحفظها كويس .. هتجيب النص
الأولاني تثبته بعدين النص الثاني..

لكن نصيحة اربط الأجزاء دي ببعض .. بمعنى لو أنا هقسم الصفحة نصين هحفظ
النص الأولاني لما هاجي أحفظ النص الثاني دايبا لما أبدأ أبدأ بآخر آيه في النص الأولاني
علشان الصفحة تركب معايا وده بقي تعرفه في الإخوة الي بيعمل كده والي مبيعملش
كده تيجي تسأله تعرف على طول مثلاً إيه حفظ سورة البقرة شيخ امتحني اقعد اقله
" فَجَعَلْنَهَا نَكَلًا لِّمَا بَيْنَ يَدَيْهَا وَمَا خَلْفَهَا وَمَوْعِظَةً لِّلْمُتَّقِينَ "

كَمَلْ إيه؟! .. عارف أنت الجو ده إيه؟! .. أنا حافظها يا شيخ ده أنا مثبتها .. دي في
أول حزب .. ده أنا مراجعه مية مرة .. أنا عارف أنا بسأله السؤال ده ليه لأن بعدها إيه
محدث عارف طبعاً **"وَإِذْ قَالَ مُوسَى لِقَوْمِهِ إِنَّ اللَّهَ يَأْمُرُكُمْ أَنْ تَذَبْحُوا بَقَرَةً"** .

أنا متأكد إن أي حد ببيجي يحفظ الصفحة دي لما ببيجي يحفظها بيحفظ النص الأولاني
ده لواحد والنص الثاني ده لواحد لأن دي قصة بدأت فبالتالي يقسم الصفحة ..



أي حد مهما كان لازم بيقسم الصفحة دي فبعرف بقا علي طول أكيد هو مقسم الصفحة فاروح سائله في آخر آيه في النص الأولاني فيتتح أعرف على طول إن ده إيه مش رابط ..

أروح مديله بقي واحدة كمان الثانية بقا اجيله آخر آيه في صفحة ما مثلا أي آيه عموما يعني آية في آخر الصفحة .. إيه؟! ..

نفس الجود ده مش قادر يكمل لأنه هو حفظ الصفحة دي لوحدها والصفحة دي لوحدها ...

أو اجبله آخر آيه في ربع واقوله كمل متتح برضه مش عارف يكمل لأن هو لما حفظ حفظ الربع ده لوحده والربع ده لوحده ..

يبقى أنا عندي مشكلة في إن كل حاجة سليمة بس لوحدها هي دي المشكلة .. أصل أنا الموضوع ده حصلي في أول الحفظ حفظت أول جزء في البقرة .. تمام؟! ..

دي كانت الضربة اللي أنا اتعلمتها .. جيت أراجع كل صفحة بقف مش عارف إيه اللي جاي .. ففهمت بقي بعد كده لما تيجي تحفظ تعمل الآتي .. لازم تحفظ تربط الصفحة بالصفحة والموضوع بالموضوع والربع بالربع ..

بمعنى أنا بحفظ صفحة دلوقتي لما آجي اجيب الصفحة ماجبهاش من أولها **بجيبها من آخر آيه من الصفحة اللي قبلها ..** لو أنا بحفظ صفحة على بعضها هجيب معاها آخر آيه في الصفحة اللي قبلها وأول آيه من الصفحة اللي بعدها علشان على طول تبقى ارتباط ذهني في الموضوع ده ..

لا ده أنا بحفظ نص صفحة ونص صفحة هجيب آخر آيه في الصفحة اللي قبلها واحفظ النص وأول آية من النص الثاني .. لما آجي احفظ النص الثاني من الصفحة اجيب آخر آية في النص الأولاني مع أول آيه في الصفحة اللي بعدها .. وبعد كده اروح جايب كله بقي إيه مع بعض ..



ودايما لما أخلص ربع أجيب آيه من الربع الي بعديه عمرك ما هتنتسى أبدا ..
تفضل الدنيا تمام عندك .. هتعمل غير كده هتبقى ميه ميه بس كل حاجة
لو حدها مش عارف أجيب الصفحة مش عارف أكمل وقفت أصل ده
موضوع ثاني .. أصل النص ده غير النص ده .. مش هيحصلك كده
خلاص.

بعد كده خلصت حفظ الصفحة .. **تمام؟** .. دلوقتي أنا عندي احتمالين إن
الصفحة دي اتحفظت وإن الصفحة دي ما اتحفظتش .. **يعني إيه الكلام ده؟** .. ما أنا
جبتها أهو ...

لا أنت عندك حاجة اسمها **الذاكرة قصيرة المدى** .. إيه الذاكرة قصيرة المدى؟ .. الي
أنت بتعملها قبل الامتحان بتجيب مذكرة تروح ضاربها في الموصلات تخش تقفل
الامتحان تطلع نسيت كل حاجة .. صح مش بيحصل؟ ..

أنا أذكر إني ذاكرت مادة مية صفحة في يومين جبت امتياز طلعت من الامتحان مش
فاكر ولا كلمة هي أنا لازقتها بالعافية .. كانت مادة أدبي كده في هندسة أنا مبحبش
المواد الأدبي ..

كانت مية صفحة في يومين حفظت كل يوم خمسين صفحة متسألنيش إزاي امتياز تقولي
بعد الامتحان أنت كنت فين ما عرفش فيه ناس كده في القرآن .. هو حفظ لكن هو لحد
دلوقتي ميقدرش يتأكد هي دلوقتي في الذاكرة القصيرة الي هي بتحفظ بسرعة دي
وبتنسى السرعة ولا في الذاكرة الطويلة الي بتحفظ بالراحة وبتنسى بالراحة .. **طب**
يعمل إيه بقى صاحبنا؟ ...

اه دي بقا مهمة جدا .. أصل الي بيحصل تروح للشيخ تسمع تغلط .. والله حافظها ..
والله يا شيخ كنت في البيت ما غلطش ولا غلطة .. ما أنت لازقتها حبيبي ما هي في
الذاكرة الإيه؟ .. **القصيرة** .. على ما جيت لي راحت ..



آه يبقى أنا دلوقتيني أثناء اليوم حفظت .. طبعاً يفضل إنك تحفظ في أول اليوم ليه؟..


عشان الي هقوله لك ده ما تفتحش المصحف بقى كل ثلاث ساعات أو أربع ساعات بسم الله الرحمن الرحيم وقول الصفحة زي ما تيجي معاك بقى .. الي أنت قلته ده الي **في الذاكرة الإيه؟ طويلة المدى** الي ما قلتوش ده الي **في الذاكرة إيه؟ قصيرة المدى**..

ثبته واقفل المصحف ثلاث أربع ساعات بسم الله الرحمن الرحيم قول ما تفتحش المصحف .. الي جبته ده الي ثابت الي ما جبتوش ده طار .. بفضل كده خلال اليوم تجيبها تلت أربع مرات بالطريقة دي انسى بقى خلاص ولسه هتراجعها تاني آخر الأسبوع .. هتروح للشيخ مستحيل هتغلط ..

لكن الي بيحصل إن أنت حضرتك بتحفظ قبل ما تروح للشيخ على طول وتروح للشيخ أنت ونصيبك ممكن تجيبها وما تغلطش ولا غلطة .. بس أنت الي اشتغلت نفسك .. **أنت الي هتندم** .. الشيخ هيديك امتياز يقول لك الله ينور إيه الحفظ ده .. أنت يومين وهتنساها .. **وأنت الي هتندم** .. وأنت الي هتشوف الأيام دي في المراجعة..

وأنا فاكراً أصلاً أنا شفت الحاجات دي أنا أذكر مرة كان الشيخ كان لازم احفظ آخر ربع في طه وكسلت وكان فاضل لي صفحة **طه** أسهل سورة حفظتها في السكة الصفحة نزلت من البيت وصلت للشيخ الصفحة دي اتحفظت في الشارع وفي عشر دقائق ما غلطتش ولا غلطة ..

الصفحة دي قعدت أراجع فيها سنة .. سنة مش عايزه تثبت .. واتعلمت ما فيش حاجة اسمها تحفظ وتروح للشيخ على طول فيه حاجة اسمها يكون بينك وبين الشيخ على الأقل اربعة وعشرين ساعة ..



يعني أنا معادي للشيخ النهاردة قبل ميعادي مع الشيخ على الأقل احنا ادينا
ثمانية وأربعين ساعة أنا بقول أسوأ الظروف أربعة وعشرين ساعة ..
والأربعة وعشرين ساعة دول هتعيد فيهم الي أنت جبتة تلت أربع مرات
على أوقات متفرقة ..

ساعتها هتروح للشيخ مش هتغلط ولا غلطة **عشان أنت حافظ بجد ..**
تمام؟..

يلا بينا

يفضل بقى الي هي المراجعات الي أنا قلتها لك دي تبقى في الصلاة .. يعني أنا حفظت
أول النهار هجيبها مرة في إيه في سنة الظهر .. وبعد كده في سنة المغرب .. بعد كده قيام
الليل .. يبقى أنت كده جبتها وفي إيه وفي صلاة في الصلاة ..

تبقى الوضع إيه؟.. أحسن بكثير طبعاً من النصايح بتاعة اقفل الموبايل .. اقفل الباب
.. بطل أكل .. كل الحاجات دي .. ما فيش حاجة اسمها إيه؟ بنشتغل بحاجة أثناء
الحفظ .. الحفظ الأولاني هو كل شيء .. كل حاجة مترتبة على الإيه؟ .. على الحفظ
الأولاني ..

كأن المراجعة بتنادي على الحفظ تقول اتقي الله فينا فإنك **إن استقمت استقمنا وإن**
اعوججت اعوججنا فلا تتخذ نفسك بأنك لزقت وسمعت .. تمام؟...

بعد كده تعالى نقول كلام عن **المراجعة** بقى .. احنا دلوقتي اتكلمنا عن **الحفظ** ..
مراجعة الي هي السُّبع الي أنت حافظه ده المراجعة لما آجي أراجع اعمل إيه؟..

في ناس يقول لك أنا براجع قراية .. يعني بيقرأ الورد .. حلاوة .. واحد تاني يقول لك
أنا براجع سماعي ده بسمع وبقول معاه .. حلاوتك .. **كل ده غلط** ما فيش مراجعة



اسمها مراجعة قراية دي .. ممكن حاجة كده تعملها في الوقت الفاضي ..
لكن مراجعة فيها حاجة اسمها غيب ..

النبي عليه الصلاة والسلام لما جاء له الرجل قال له أنا لما قال له تتجوز
البنت دي قال له ما عيش حاجة قال له ما عكش ولا خاتم حديد ولا أي
حاجة؟ .. قال له ولا معي أي حاجة قال ما معك من القرآن؟ .. قال سورة
كذا وكذا .. **قال أتحفظهن عن ظهر قلب؟** .. قال نعم .. **قال خذها بما معك**
من القرآن ..

فقضية الحفظ عن ظهر قلب دي تتعرف إزاي؟ .. إنك غيباً ..

بمعنى النهاردة هجيب ورد المراجعة .. مفيش حاجة اسمها تفتح مصحف .. يلا بينا
بسم الله الرحمن الرحيم قول ..
تقولي طب أنا هنسى ..

معلش هتتضايق وهتنسى وهتتغلب بس أنت هتشوف الحقيقة بقى .. هتواجه الحقيقة
.. الهروب من الحقيقة خطر وغلط .. واجه الحقيقة هي دي الحقيقة واجهها النهاردة
هتغلط عشر غلطات في الربع المرة الجاية إن شاء الله لما تيجي بعد ما واجهت الحقيقة
دي وعرفت أخطائك هتغلط خمسة وبعد كده تغلط ثلاثة وبعدين مش هتغلط
خالص ..

يعني إيه؟ ..

يعني أنت أبداً راجع وقفت اعصر تكة حاول متفتحش المصحف إلا لما تموت .. بعد
كده افتح وبص والله دي هتلق مش هتطلع تاني بعد كده ..



وأثناء المراجعة هات كراسه جنبك واكتب كل الحاجات الي غلطت فيها على جنب .. **مش لازم تبص لهم** .. خلاص دي عشان المرة الجاية لما اجيب تاني الورد ده هرجع للكراسة دي هل نفس الأخطاء ولا قلت الأخطاء؟ .. الي أنا قلت امسحها لغاية ما أوصل إن مفيش ولا إيه ولا غلطة في الربع ده أو في الجزء ده بعد كده ينصح لما تيجي تغلط في نسيت وفي غلطت .. نسيت دي خلاص نسيت هتبص في غلطت بقى قولت مثلاً إيه (و) بدل (ف) **فلما تفكر أنت قلت كده ليه؟** ..

في الغالب بيبقى أنت قلت كده بسبب **حثة تانية في القرآن شبه الحثة دي بالظبط** ..

فلو ركزت وعرفتها هتظبط الاتنين لأن أنت كل مرة بتغلط هنا مش عارف بغلط هنا ليه وهناك بتغلط برضو ومش عارف ليه .. مش عارف إن هما الاتنين دول شبه بعض الأعراف والبقرة الشعراء والعنكبوت لو عرفت دي مسكتها مية مية هتظبط الاتنين ومش هتسأهم أبداً .. وتعلمهم بقى بأي علامة بقى ..

في علامات كده تبقى مضحكة بس هي دي الي بتفكرك مش مهم أي حاجة الي يجي على بالك اعمله بس المهم تبقى علامة إيه؟ .. تفكرك بالموضوع ده وخلاص .. **ابدأ الحفظ منين؟** ..

طبعاً تبدأ الحفظ **بعمّ وتبارك ليه؟** ... **لأن هما سهلين أصلاً** كده كده أنت حافظهم شوية عشان ينفعوك في الصلاة لما تيجي تصلي بالليل .. تصلي بالناس .. تصلي مع نفسك .. حاجة سهلة تجيبها في النوافل .. وكده كده عمّ احنا شبه حافظينه **فيسهل عليك إنك تركز في التجويد** ..

لأن أنا في بداية الحفظ **عايز اركز في التجويد** .. فلو تجويد وحفظ كتير كده أوي فايبقى الحفظ في السهل واركز في التجويد ..



بمعنى إن هدي في جزء عمّ إن أنا احفظه وأنا كده كده تقريباً حافظه نص
نص يبقى تركيزي على إيه؟ .. على التجويد ..

ما ينفعش تطلع من جزء عمّ قبل ما تبقى كويس في التجويد .. لازم تتأكد
إنك في آخر جزء عمّ بقيت كويس في التجويد لأن بعد كده الموضوع هيبقى
عايز تركيز في الحفظ نفسه ..

ممكن في جزء عمّ نطول شوية .. يعني الشيخ ممكن يقول لك معلش هنطول شوية في
جزء عمّ لغاية ما تظبط نفسك في التجويد .. وممكن نصيحة ثانية إنك أنت قبل ما تبدأ
تحفظ خذ مع الشيخ حصتين ثلاثة أربعة في التجويد بس عملي ونظري لغاية ما تبقى
إيه اتحسنت شوية بعد كده ابدأ دي هتوفر عليك كلام كثير.

ممكن جزء عمّ لوحده لوحده كاستثنائي يطول يعني احنا في حسابتنا الجزء هياخذ
شهر .. صح ممكن جزء عم ياخذ له شهرين ثلاثة أربعة مش مهم .. ما عنديش مشكلة
في أول الطريق جزء عمّ ده يطول معايا بس مجرد ما خلصت جزء عمّ كل حاجة
هتجري بعد كده ..

خدت بالك؟ ...

طيب بعد كده بعد جزء عمّ وتبارك خلصناهم اعمل إيه؟ ..

آه هنا بقى في كذا طريقة ينصح بيها .. إنك تسأل شيخك تاخذ رأيه يعني تقول له بعد
تبارك نعمل إيه؟ .. ممكن يلاقيك هايب البقرة قوي مش قادر ... تقول له لا لا بلاش
سورة البقرة كبيرة قوي ده أنا يجي لي احباط على ما اخلصها .. أو يقول لك متحمس
قوي لسورة البقرة ..

ممكن الشيخ يعني يبقى ليه وجهة نظر معاك يعني .. لكن هو في طريقين أقرب
الطريقين هي الطريقة دي إما إنك أنت بتنتقل فوراً لسورة البقرة ..



بتبتدي بقى من قدام عادي بقى خلاص .. من قدام لغاية الآخر .. هي دي ممكن تكون أصعب شوية .. بس أنا بميل إليها لسبيين .. السبب الأول أن سورة البقرة **اخذها بركة وتركها حسرة ..**

اخشى إن أنت تحفظ وتخلي سورة البقرة في الآخر تموت قبل ما تحفظ سورة البقرة **تركها إيه؟ .. حسرة .. يبقى أنا الحق اخذها ...**

وكمان اخذ معاها آل عمران يبقى الدنيا جميلة نموت بقى مش مشكلة أنت فاهمني؟ ... لكن تخيل واحد حافظ القرآن ومخلصش البقرة وآل عمران يبقى زعلان جداً.

دي السبب الأولاني....

ثم البركة دي هتعود عليك في كل اللي أنت هت حفظه بعد كده .. هتلاقي بركة عجيبة في الحفظ بعد كده كل حاجة سهلة ما أنت خلصت سورة ٢٤٨ صفحة أي حاجة سهلة بعد كده كل السور تمام ..

الحاجة التانيه إن ده **هيساعدك في دراسة العلم الشرعي** لأن أغلب الأحكام الشرعية في **ربع القرآن الأولاني** السور المدنية البقرة ، آل عمران ، النساء ، المائدة ، الأنعام ، أغلب الأحكام في اللي هما السور دي فلما تخلص دول يبقى سهل عليك طلب العلم بعد كده حتى لو الموضوع الباقي ده هيطول مش مهم ده سور مكية قليل من الأحكام بتلاقيها في السور المكية واضح.

لأ أنا صعب مش هقدر ابدأ البقرة في الطريقة التانية بقى ...

إنك أنت تقفز قفزات هتخلص سورة **تبارك** تروح منتقل **لق** تاخذ من **ق** ونازل لغاية إيه؟ ... **تبارك** خلصت دي تطلع من **ق** تخش على **يس** تاخذ من **يس** ونازل لغاية **ق** بعد **يس الكهف** تجيب من **الكهف** لغاية **يس** .. وبعد كده بقى من البقرة لغاية **الكهف** دي طريقة ودي طريقة ..



في ناس بيحبوها لأن هي سهلة تجيب لك السور السهلة في الأول وبعد كده السور الكبيرة تخليها في الآخر يعني المسألة دي مش مهم يعني كل واحد يختار الطريق الي يريجه.

مهم جداً حاجة آفة بتحصل إن الناس لما تيجي تحفظ في الأول عمّ وتبارك مثلاً وحفظ من ق لتبارك .. وبعد كده بدأ سخن شوية .. قالك عايز ابدأ بالبقرة يجي يحفظ البقرة و آل عمران لما يجي يراجع بيراجع إيه البقرة وآل عمران طب الي ورا؟...

تقوله حافظ أد إيه يقولك البقرة وآل عمران وشوية أجزاء من الي ورا ..
طيب الي ورا ده مايتراجعش ليه؟..

مش عارف

في العادة الي بيحيي يحفظ من قدام بيبتدي ينسى المراجعة الي من ورا ده وينساه ليه حرام **مش لازم وردك يبقى ورا بعضه** أنا وردي سبع أجزاء فيه اتنين قدام وخمسة ورا عادي بجيبهم كل يوم جزء ما تهملش أبداً .. **حتى جزء عمّ ما تهملوش ..** والله يتفلت منك جزء **عمّ** يتفلت منك لو ما رجعتوش.

النصيحة الي بعد كده **اقرأ تفسير الميسر مع الحفظ تفسير الميسر** الي هو على هامش المصحف ده بيفيدك في إيه؟.. **الفهم بردو.**

يفرق اما تفهم تبقى أحسن وبيفيدك يمكن إن أنت موضوع خواتيم الآيات بيساعدك تلاقي الآية دي آخرها سميع بصير ودي آخرها عليم حكيم ودي آخرها تتلغبط .. لكن لما تفهم الآية ممكن تسهل على نفسك ..



الآية دي لازم تتختم طبعاً **سميع بصير** والله دي مناسب جدا لمعناها ..
ودي لازم تخلص بعلي كبير مناسب جدا لمعناها ل.. ما تفهم هتسهل عليك
موضوع المتشابهات ده الي هو خواتيم الآيات.

تقولي آه صح **خواتيم الآيات دي أعمل فيها إيه؟..**


بص خواتيم الآيات دي متركزش فيها في الأول احفظها عادي زي
ما بتحفظ أي حاجة ..

بس صعب إنك أنت تجمع ما بين الحفظ وإنك تبقي متين في الخواتيم من مرة واحدة
الخواتيم دي مش هتيجي معاك إلا بمراجعات كتير كل لفة مراجعة ركز على إيه آية
آيتين في الخواتيم مثلاً الصفحة فيها إيه خاتمتا ثلاثة أربعة خمسة كل مراجعة ركز في
واحدة ثبتها جامد على خمس ست مراجعات هتلاقي الخواتيم دي ثبتت..
واضح؟.. هي مش هتيجي على طول ..

تقول لي طب اجيب كتاب في المتشابهات واقرأه ممكن يلغبطك على فكرة ممكن يساعدك
وممكن يلغبطك ... **ليه؟..**

لأن في حاجات هي بالنسبة لك مش متشابه هي بتيجي معاك سهلة وفي حاجات
بالنسبة لك بتلغبط فيها .. الكتاب بيحيب لك كله بقى ممكن يلغبطك في حاجة أنت
اصلاً ما كنتش تتلغبط فيها ..

فالخواتيم دي موضوع شخصي بينك وبين القرآن أنا بتلغبط في إيه تحل مشكلتك دي..
خلاص لكن المتشابهات دي هتتحل في أول حفظ .. **مستحيل في أول مراجعة** مستحيل
ممكن عشرة عشرين مراجعة عشان تبتدي تمسك خواتيم الآيات دي متغلطش فيها أبداً
عادي الموضوع بيطول ومتستعجلش فيه .. **تمام؟..** بعد كده احنا قولنا احنا كل يوم
بنراجع **سُبع المحفوظ .. مش كده؟..**



خلينا نخش كلام مراجعة يفضل إن السُّبع المحفوظ ده نخلي نصيب منه كبير في قيام الليل .. يعني أنا تراجع كل يوم حزب خلي ربعين في قيام الليل الحزب كله في قيام الليل لا تراجع كل يوم جزء خلي حزب في قيام الليل وحزب كده إيه؟ ..

حزب بقى في الوقت الي احنا قولناه ده يفضل لأن القرآن إذا اتقرا في الصلاة عمره ما يتنسى واحسن مود تراجع فيه هو إيه؟ .. الصلاة.

احنا بنقول جو تركيز هو في جو تركيز أحسن من الصلاة لا أكل ولا شرب ولا تليفون ولا تتكلم ولا تنطق بعد كده.


نصيحة تانية خلي لك صاحب في قصة الحفظ دي .. بس يكون عنده همة منافس لك أو أحسن منك أقل منك بقى والجو المتعب ده أبعد عنه فوراً.

احذر من الحسد فكم من شخص سلك الطريق وتوقف حفظه بسبب الحسد لا تقصص مقدار حفظك على من يكرهك فيكيد لك كيدا إن الشيطان للإنسان عدو مبين...

لا تقصص لأحد هذا الأمر إلا من تحب ومن يحبك قوي ممكن تقول له يعني أنت كده الأفضل ما تقولش لحد إلا يعني إذا احتجت لذلك .. ممكن واحد يدريك واحدة الدنيا تقف معاك خالص .. وفي ناس كتير حصل معاهم كده فعلاً وقف نموه في الحفظ بسبب الحسد طب ليه؟ ..

طيب تعالى نقول بسرعة نكمل طيب أيام الامتحانات خد بالك الي أنا المنهج الي أنا حظيته ده مدته تلت سنين لو حسبتها هتلاقي إن هم يخلصوا السنتين ونصف احنا بنحفظ كام صفحة في الأسبوع خمسة يعني أنا بحفظ جزء في شهر مش كده؟ يعني كام جزء في السنة؟ ١٢ يعني السنتين ٢٤ يعني إيه اختم في قد إيه؟ ستين ونص.

طب تقول لي أنت ليه حظيت منك ست شهور؟



عشان الظروف دي أيام الامتحانات فاضطر أوقف طبعاً هوقف إيه
تفتكر؟ حفظ إيه تاني؟ قراءة المراجعة مينفعش تقف مينفعش تقف بأي
حال من الأحوال حياة أو موت دي لحملك ودمك وقف في الحفظ أنا
موافق وقف القراءة أنا موافق وقف المراجعة

لأ تقولي الدنيا مزنقة معايا قوي أسوأ الظروف أسوأ الظروف بدل ما تراجع
في سبع أيام خليه عشرة أو خليه ١٤ أكثر من كده لأ أكثر من كده لأ
سبعة ممكن يبقوا عشرة ممكن يبقى ١٤ أقصى حاجة هتقسم على ١٤ أكثر من كده
صعب هتنسى صدقني

سيب مراجعة بس مش سيب المراجعة من أيام ما بدأت تذاكر مش قبل الامتحانات
بشهرين أو مال هنعظم إمتي قبل الامتحانات بأسبوع والامتحانات وخلاص لكن
بقي في واحد يقف أصل يا شيخ أنا بذاكر طول السنة ..

بتذاكر طب اعمل لك إيه .. في خطة تانية بقي حلوة إنك

أنت عوض اللي وقع منك ده فين؟...

في الأجازة .. الأجازة أنت فاضي بقا هتحفظ برضو صفحة في اليوم خليه صفحة
ونص خليه صفحتين عوض اللي وقع منك ..

ممكن نثبت الستين ونص يا عم أنا راضي خليه صفحة واخليها ٣ سنين ما عنديش
مشكلة سهلة كده ثلاث سنين يا إخوانا .. يعني لو بدأت الحفظ في أولى كلية على سنة
تالته تكون خلصت إيه المشكلة؟..

لو بدأت في أولى ثانوي تخلص تالته ثانوي إيه المشكلة؟.. سنين عدت وما عملناش
حاجة إمتي هنعظم طيب؟...



لما تيجي تراجع يفضل ما تكروتش بمعنى أقل حاجة في المراجعة الحدر
يعني إيه الحدر بقى؟...

يعني بتقرأ القرآن بالأحكام بس يعني أقل مقدار من الأحكام يعني الغنة
بتجيبها يعني بس مش حركتين قوي يعني المد تلت حركات بلاش أربعة
.. يعني إيه؟...

بتجيب يعني بسرعة شوية كده خد بالك

{ إِنَّ الَّذِينَ ءَامَنُوا وَعَمِلُوا الصَّالِحَاتِ سَيَجْعَلُ لَهُمُ الرَّحْمَنُ وُدًّا (96) فَإِنَّمَا يَسَّرْنَاهُ بِلِسَانِكَ
لِتُبَشِّرَ بِهِ الْمُتَّقِينَ وَنُنذِرَ بِهِ قَوْمًا لَّدَا (97) وَكَمْ أَهْلَكْنَا قَبْلَهُمْ مِّنْ قَرْنٍ هَلْ تُحِسُّ مِنْهُمْ مِّنْ
أَحَدٍ أَوْ تَسْمَعُ لَهُمْ رِكْزًا (98) } سورة مريم

كده بقى يعني بتجيب يعني لكن ما فيش حاجة اسمها بتوقع الغن ما فيش حاجة
اسمها بتوقع المدود .. ما ينفعش لازم تجيب الغن والمدود حتى لو بسيط لازم ولو
عليت شوية ورتلت أحسن بكثير .. لو الوقت ما يسمحش خليك في الحدر ..
أقل من الحدر لأ .

إياك أن يملك الشوق إلى ختم القرآن أن تندفع في الحفظ وتهمل المراجعة ستندم ندم
السنين هتحفظ كثير قوي بعد ما تخلص هتفرح وهيبقى اسمك ختمت وما حدش
عارف المصيبة إنك مش فاكر حاجة وهتقعد ختمت في شهرين ثلاثة هتقعد تراجع
ميت سنة بقى .

أنا مش بقول لك لو أنت تقدر تحافظ على الختمة السريعة مع المراجعة الي أنا قلتها سُبُع
الي أنت حافظه في اليوم اعمل الي أنت عايزه لكن تحفظ بسرعة وتيجي على المراجعة
هتندم ندم السنين .. عندي يحفظ بالراحة مع مراجعة أحسن ما تحفظ بسرعة من غير
مراجعة هتحفظ بسرعة مع المراجعة يا سلام شرفتنا يا ريت لكن هتحفظ بسرعة
وتضحى بالمراجعة ده اسمه الهروب الجميل إن أنا عليا مراجعة كثير فأنا عايز ارضي



نفسي أحس إن أنا مع **القرآن** حلوا أقعد احفظ المراجعة بتزيد احفظ قاعد أنت إيه؟ .. بتهرب؟ .. عايز ترضي نفسك أنا كويس مع القرآن وأنت بتضيع خلي بالك.

آخر حاجة بسرعة كده في حاجات بقا إيه نصايح **زيادة** .. سنة خلاص احنا فهمنا الي أنا قولته ده .. هديك تلت حاجات زيادة عن الي أنا قلتهم.

بس التلات حاجات دي **للمتميز** بقى الي هو يعني إيه عنده وقت وعايز يبقى أقوى شوية بس الي أنا قلتته ده كفاية ...

هديك تلت نصايح عايز تعملهم اعملهم مش عايز تعملهم حسب وقتك.

أول حاجة:-


اسمها **السماعة** .. إنك أنت غير الي أنا قولته كله لازم يبقى لك ورد **سماع** في اليوم حزب على الأقل .. اسمع القرآن .. ده هيساعدك لما تيجي تقرأ تقرأ صح الي هي القراية الي أنا بقول لك عليها.

نمرة اتنين:-

تحضير الصفحة بتاعة النهاردة بالليل من امبارح .. بمعنى أنا النهاردة هحفظ الصفحة اكس سين هاجي ليلتها قبل ما انام **اقرا** الصفحة دي خمس مرات و**اسمعها** خمس مرات وانا ماتفرج على أثر الموضوع ده تاني يوم تاني عشان آخر حاجة المنح سمعها قبل ما ينام بتثبت.

مممكن واحد يفكر في حاجة فينام يحلم بيها .. **صح؟** ..

فدايا الحاجة الي بتخش لك **قبل ما تنام** على طول دي بتلرزق ..



قبل ما تنام اقرأ الصفحة خمس مرات اسمعها خمس مرات .. نام .. ده له أثر كبير جدا في حفظ الصفحة .. ثاني يوم عايز تعمل كده اعمل ... أنا بقول لك دي حاجات إيه زيادة اسمه التحضير الليلي.

التالثة الأخيرة:-

دي بقى **للمتميز قوي في المراجعة** .. فاكر احنا قلنا المراجعة كل يوم بتراجع **سبع** الي أنت حافظه ..

في حاجة زيادة بقى ممكن تعملها لو عايز تتميز لو عندك وقت شيل من الي أنت حافظه آخر جزء .. شيل من الي أنت حافظه **إيه ؟** ..

آخر جزء

وردك الي هو **المراجعة** كل الي أنت حافظه ماعدا آخر جزء لأن آخر جزء ده دائما يبقى طازة كده جديد يعني محفوظ يعني نص نص لسه ما ثبتش .. آخر جزء ده هتراجع كل يوم يبقى أنا هراجع السبع الي أنا حافظه واراجع آخر جزء حفظته غير .. الحفظ غير القراءة .. غير السماع ده بقى الي عايز بقى إيه ..

بص .. **كده أنت عدت** لو مش قادر خلاص **بلاش** دي لكن لو عايز تتميز اكثر شيل آخر جزء من المراجعة الي هي الكبيرة بتاعتك دي آخر جزء ده يتراجع كل يوم الي هم آخر عشرين صفحة كل يوم قد مثلاً لمدة الأسبوع ده الأسبوع ده أنت حفظت كام صفحة خمسة صح؟ .. ده آخر جزء .. آخر العشرين دول هتشيل منهم دلوقتي إيه؟ هتشيل خمسة ..

يعني أنا كنت براجع دلوقتي من أربعين لستين **صح ؟** .. ده آخر جزء أنت حافظه دلوقتي أنت حافظ لغاية صفحة كم؟ خمسة وستين .. يبقى آخر جزء عندك من خمسة واربعين لخمسة وستين ده هيتراجع كل يوم لو عايز...

أخيراً:-

كل شوية اقول لكم أخيراً صح؟ بشتغلکم؟

كلمة سريعة لي **حافظ** من زمان **ونسي** .. أنا حافظ ياشيخ ونسيت .. دقيقة واحدة الي حافظ من زمان ونسي ده عنده ثلاث حاجات ..

عنده حاجة **فاكرها** في جزء من الي هو بتاع زمان ده فاكركه **كويس** .. وفيه **نص نص** .. وفيه **ضايح** صح؟ ... مش هو ده الي موجود فيه؟ .. **تمام؟** .. في نص نص وفي إيه؟ .. **ضايح**.

التمام ده خلاص ابدأ من دلوقتي اعمل له الورد المراجعة الي احنا إيه عارفينه سُبعه كل يوم .. سُبْع **التمام** ده .. كل يوم ابدأ راجعه .. خلاص ده سهل .. ده نمرة واحد .. **الضايح** انسى إن أنت حفظته عشان ما نوجعش قلب بعض عشان ده مش هيتراجع وصعب يتراجع انسى إن أنت إيه؟ .. **حفظته** .. هنعتبره مش محفوظ خالص عشان نريح نفسنا .. لأن ده هيتعبك قوي وهتلاقي نفسك بتحفظه بردو في الآخر هنعتبره إنك محفظتهوش خالص.

فاضل النصف النصف .. ده ممكن نلحقه هنعمل إيه بقى في النص نص ده طبعاً .. احنا مش هنبدأ حفظ جديد أبداً قبل ما نخلص صاحبنا الي في **النص النص** ده لازم يبقى زي أخوه الي محفوظ **كويس** هعمل إيه؟ طبعاً ده حاله **كويس** يعني ممكن اجيب معاه هيبقى حفظ

بس **حفظ سريع** .. بمعنى إيه؟ ..

إن أنا كل يوم مش عارف كنا بنحفظ **صفحة** في اليوم صح نحفظ **ثلاثة** من **النص نص** دوت بدل صفحة نحفظ إيه؟ .. ثلاثة أو اتنين أو أربعة حسب حالته.





يعني ورد الحفظ بتاعي كل يوم إيه؟ **ثلاث صفحات لمدة خمس أيام** وآخر يومين تراجع كل الي في الخمس أيام وبسمع للشيخ كل الأسبوع ده لغاية ما النص النص ده يبقى إيه؟.. يخلص وبعد كده هرجع تاني الي أنا **مش حافظه أصلاً** مع الي ضايع هعتبره بردو مش حافظه أصلاً وارجع تاني صفحة صفحة عادي ...

يبقى النص نص ده **رقّيته** خلّيته **محفوظ كويس** .. واتعاملت مع **الضايع** زي الي مش محفوظ .. بقى دلوقتي بتعامل معاه إن أنا مش حافظ وبتبدأ عادي صفحة صفحة وثبت الورد بقى بتاعي المراجعة حطيت الي كان محفوظ كويس مع **النص النص** ده بعد ما عليته وبقي إيه **سُبع** الي أنا حافظه كل يوم **عادي**.

قيل لأحد السلف فلان **يحفظ القرآن** قال بل **القرآن يحفظه** حط القاعدة دي مهما **حفظت القرآن هو الي بيحفظك** مش أنت الي حافظه لا تكونوا كالتّي **نقضت** غزلها من بعد قوة لا تنسوا أن الذنوب **أخطر** عدو للحفظ فإذا **انصلحت** الذنوب **انصلح** الحفظ.

"شكوت إلى وكيع سوء حفظي فأرشدني إلى ترك المعاصي أخبرني أن العلم نور ونور الله لا يؤتى لعاصي"

جزاكم الله خيراً والحمد لله رب العالمين.

لا تنسونا من صالح دعائكم